

TEZAU LITURGIC

31 MARTIE

ACATISTUL SF. CUVIOS FILARET DANILEV DE LA GLINSK



MOSCOVA, 2000



АКАФИСТ

преподобному и богосному отцу нашему Филарету, игумену и чудотворцу Глинскому

Кондак 1

Избранниче возлюбленный Божия Матери, дивный и преславный украсителю обители Глинския, преподобне и богоносне отче наш Филарете, пение сие немощное ныне прими и от всяких бед избави нас, вопиющих: Радуйся преподобне отче Филарете, славо и украшение обители Глинския.

Икос 1

Ангельски житие провождаше, сподобился еси ликом ангельским причтения, отче преподобне Филарете, и ныне со безплотными ликующе, молитву приносиши всех Творцу и Богу о всех, славословие сицевое ти возглашающих:

Радуйся, ангелов собеседниче;

Радуйся, человеком наставниче.

Радуйся, всех святых сомолитвениче;

Радуйся, христианом помошниче.

Радуйся, сопричастниче вечныя радости;

Радуйся, приятилище божественныя сладосте.

Радуйся, чудес Христовых всеславное явление;
Радуйся, страны наша похвало и утверждение.
Радуйся, преподобне отче Филарете, славо и
украшение обители Глинския.

Кондак 2

Ведуще, яко много может молитва праведнаго, к
тебе, отче, прибегаем и тя усердно молим:
милости от Господа испроси всем, верою
воспевающим Того славу и величество и
зовущим: Аллилуиа.

Икос 2

Разум имущь благодатию Божию просвещен,
стяжал еси духовная дарования и явился еси
провозвестник вечнаго Евангелия, чадом твоим
истину выну проповедуя и путь ко спасению
указующе всем, взывающим ти сице:
Радуйся, пастырю наш добрый;
Радуйся, отче наш благодатный.
Радуйся, присное заблуждающих вразумление;
Радуйся, веры преславныя утверждение.
Радуйся, милостей Божиих провозвестниче;
Радуйся, правды Божией светильниче.
Радуйся, проповедниче богопросвещенный;
Радуйся, в добродетели преславно
утвержденный.

Радуйся, преподобне отче Филарете, славо и украшение обители Глинския.

Кондак 3

Сила Вышняго от юности храняше тя, отче достославне, и на путь спасения наставляше, егда восхотел еси стезею шествовати теснаго жития иноческаго, Господу усердно работая и непрестанно вопия: Аллилуиа.

Икос 3

Имея желание всеусердное Господу Своему поработати, восприял еси образ монашескаго равноангельнаго жития и вся искушения и соблазны врага вселукаваго преборол еси, сего ради похвалы сицевыми ублажаешься:

Радуйся, лику иноческому сопричтенный;

Радуйся, житием добротетельным светло украшенный.

Радуйся, в ризу правду облекшийся;

Радуйся, благодатных дарований сподобльшийся.

Радуйся, отцем древним всеусердно подражавый;

Радуйся, чистоту тех и смирение стяжавый.

Радуйся, мира суету и страстей течение отринувый;

Радуйся, чистоту и богомыслие паче всяческих

возлюбивый.

Радуйся, преподобне отче Филарете, славо и украшение обители Глинския.

Кондак 4

Бурное море житейское не возмогоша потопити спасительную ладью молитвенную, на нейже подвиг свой безпрепятственно совершил еси, отче наш Филарете, и достигл еси необуреваемого пристанища Христова, идеже песнь воспевается: Аллилуиа.

Икос 4

Слышаше в сердце своем призыв Христов, на подвиг тя призывающий, мужественно Господу последовал еси, со апостолом вопия: вся могу о укрепляющем мя Иисусе, темже и мы пение ти приносим, глаголюще:

Радуйся, крест служения Господу приявый;

Радуйся, всему миру образ благочестия явивый.

Радуйся, благодатию Божией укрепляемый;

Радуйся, светом лица Божия выну озаряемый.

Радуйся, сладость молитвы в житии своем вкусивый;

Радуйся, обеты иноческа неврежденно сохранивый.

Радуйся, от падений греховных нас ограждающий;

Радуйся, на путь правды нас премудре наставляющий.

Радуйся, преподобне отче Филарете, славо и украшение обители Глинския.

Кондак 5

Божииим светом Всеблагим разум твой просвещен бысть, сего ради многая и преславная дела совершил еси во славу Божию и во прославление Пречистыя Матери Его, храмы благоукращающе и Господу воспевающе: Аллилуиа.

Икос 5

Видяще благодати Божией обильное изливание на тебе, богомудре отче, явленное, епископ Евгений призва тя к игуменскому служению и на свещник высокий воздвиже тя, да светом любви осияеши братию обители Глинския и ко Христу неврежденно приведеш паству твою, пение сицевое ти приносящую:

Радуйся, жезл наказаний игуменский восприявый;

Радуйся, паству твою тем добре управивый.

Радуйся, любви отеческия откровение;

Радуйся, промысла Божия всечудное совершение.

Радуйся, в молитве к Богу предстоятелю;

Радуйся, Небесных благ всеславный раздаятелю.
Радуйся, ко благочестию нас ученьми своими
наставляющий;
Радуйся, от всякия напасти нас избавляющий.
Радуйся, преподобне отче Филарете, славо и
украшение обители Глинския.

Кондак 6

Проповедует обитель Глинская славу деяний
твоих, досточудне отче Филарете, храмами
Божиими красующеся и собором святых
похваляющеся, и, поминающе наставления
твоя, Богу непрестанно хвалу возносит,
вопиюще: Аллилуиа.

Икос 6

Возсия слава Божия и явися спасительное
промышление Господне, еже о Церкви Святией.
Тобою бо, отче достославне Филарете, обитель
Владычицы Богородицы благоукрасися и житие
иноческое в той благообразне исправися, темже
чада твоя духовная пение пение ти приношаху
сицевое:

Радуйся, храмов Божиих украсителю;
Радуйся, веры и благочестия хранителю.
Радуйся, иноческих обетов блюстителю;
Радуйся, нечестивых обычаев искоренителю.
Радуйся, Пречистой Владычице чисте

послуживый;

Радуйся, благословение Ея во смирении
восприявый.

Радуйся, волю Господню всецело исполнивый;

Радуйся, Небеснаго Отечества достигнувый.

Радуйся, преподобне отче Филарете, славо и
украшение обители Глинския.

Кондак 7

Хотяще всем сердцем прославити Пресвятую
Владычицу Богородицу, украсил всеславно
обитель, во славу Имени Ея Преславнаго
воздвигнутую, темже прославление от Нея
приятно сподобился еси и душа твоя, отче
треблаженне Филарете, обитель
благоукрашенная явися, идеже Господь выну
прославляется и хвала Ему присно
возсылается: Аллилуиа.

Икос 7

Нового Моисея, путеводяща к Небеси стадо свое,
зрим тя, преподобне отче наш Филарете,
ученьми бо своими наставляеши к добродетели и
подвигу вся, пеньми сицевыми тя ублажающия:

Радуйся, наставниче наш благодатный;

Радуйся, отче милостивый и кроткий.

Радуйся, трапезою Небесною насыщенный;

Радуйся, питием бессмертия напоенный.

Радуйся, словесы своими всех просвещающий;
Радуйся, ученьми своими всех утешающий.
Радуйся, светильниче, огнем добродетели
возженный;
Радуйся, благодатию Христовою
преукрашенный.
Радуйся, преподобне отче Филарете, славо и
украшение обители Глинския.

Кондак 8

Странну всякаго зла и порока соблюл еси душу
твою, преподобне отче наш Филарете, и
добродетели вместилище всеславное явился еси,
Господу присно работая и всем житием песнь
Ему составляюще похвальную: Аллилуиа.

Икос 8

Весь благодатию Божией облекся еси, яко
светлою ризою и боготканною, отче наш
преподобне, темже и вшел еси непрепятственно
во святилище Божие, идеже мольбы и моления
присно приносици всех благих Подателю о
чадах твоих, песнями тя сицевыми
похваляющих:
Радуйся, непрестанно о всех молитвы
приносящий;
Радуйся, о чадах твоих духовных присно
ходатайствующий.

Радуйся, молитвы кадило благоуханное;
Радуйся, стено ограждения нерушимая.
Радуйся, звездо всесветло пламенеющая;
Радуйся, к жизни нетленной путь указующий.
Радуйся, яко предстательством твоим мир с
Богом обретаем;
Радуйся, яко путем твоим к Небеси восходим.
Радуйся, преподобне отче Филарете, славо и
украшение обители Глинския.

Кондак 9

Всякия избави нас напасти и скорби, отче наш
богомудре Филарете, ты бо в молитве присно
предстоиши престолу Божию и молишия о
душах наших, яко истинный друг Христов и
чудотворец всемилостивый, непрестанно Богу
взывающе: Аллилуиа.

Икос 9

Извитийствовал еси всемудренно уставы и
правила жития иноческаго, отче преславне
Филарете, пекущися о соборе монашествующих и
о дружине святых, от Бога попечению твоему
врученной, яже похвалы и пение ти возсылают
сице:
Радуйся, спасения нашего споспешниче;
Радуйся, от лукавства духов злобы всемогущий
помощниче.

Радуйся, Православия утверждение;
Радуйся, злобы адския обличение.
Радуйся, Путем Господним присно ходивый;
Радуйся, многих от путей погибельных
отвративый.
Радуйся, черноризцев похвало всерадостная;
Радуйся, православных песнь всеславная.
Радуйся, преподобне отче Филарете, славо и
украшение обители Глинския.

Кондак 10

Спасение многих взыскал еси, отче богомудре, и
сам для всех был еси всем, глаголу
первоверховнаго апостола последствуя, да
приобрящещи вся Христу Богу и к невечернему
Царствию приведещи, идеже песнь Творцу
всяческих приносится: Аллилуиа.

Икос 10

Стена молитв присно защищает обитель
Глинскую и покров твой выну заступает всех,
подвиг свой zde совершающих со упованием
твердым на всемилостивую Владычицу и твое
отеческое предстательство, темже лица
иночестии похвалу ти составляют, взывающе:
Радуйся, крепкое ограждение от находящих на
ны искушений;
Радуйся, нетрудное отгнание напастей и

скорбей.

Радуйся, мечу, злочестие посецающий;

Радуйся, щите, верных защищающий.

Радуйся, росе, еюже огонь безбожия угашается;

Радуйся, море, имже зловерие потопляется.

Радуйся, Царствия Христова наследниче;

Радуйся, вечныя Пасхи причастниче.

Радуйся, преподобне отче Филарете, славо и украшение обители Глинския.

Кондак 11

Пение паче иных принесл еси Престолу Вседержителя и труды множайшими стяжал еси милость Божию. Темже, яко раб благий и верный, талант сторишно преумноживший, вшел еси в радость Господа своего и водворился еси во дворех правды, идеже песнь присно воспевается: Аллилуиа.

Икос 11

Светом немеркнуцим озарена бысть душа твоя во время исхода твоего, егда шествовала еси ко Владыце и Пастыреначальнику, крест яко победы знамение носяще, Господа благодаряще и молитву возносяще Ему о всех, похвалы сицевыми тя славящих:

Радуйся, селений небесных преславно достигнувый:

Радуйся, в чертозах пресветлых водворивыйся.
Радуйся, на брак Агнчий всерадостно возшедый;
Радуйся, венцем безсмертия увенчанный.
Радуйся, Светом Невечерним озаренный;
Радуйся, Славою Божиею просвещенный.
Радуйся, крепкое падающих возведение;
Радуйся, право стоящим утверждение.
Радуйся, преподобне отче Филарете, славо и
украшение обители Глинския.

Кондак 12

Благодати Божией источник неоскудеваемый
явишася всем верным мощи твоя честныя,
излевают бо токи исцелений и помощь Небесную
всем, с верою к тебе прибегающим и тобою
Господу молитву приносящим: Аллилуиа.

Икос 12

Поюще и восхваляюще подвиги и труды твоя,
поминаем наставления твоя, отче наш всеславне
Филарете, чтим память твою всерадостно и
мощем твоим поклоняемся достолепно, молитвы
и моления возсылающе:

Радуйся, сосуде, благодатию преисполненный;
Радуйся, ковчеже, дарами Духа всеукрашенный.
Радуйся, чудес источниче неистощимый;
Радуйся, исцелений кладезе неисчерпаемый.
Радуйся, вселукавых духов прогонителю;

Радуйся, козней диавольских победителю.
Радуйся, яко тобою от напастей избавляемся;
Радуйся, яко тобою благодати сподобляемся.
Радуйся, преподобне отче Филарете, славо и
украшение обители Глинския.

Кондак 13

О, всеславне и досточудне отче наш Филарете,
пустыни Глинския преславный возродителю и о
всем мире ходатае теплейший, от обителей
славы Горняя призри на чада твоя и молитвами
твоими от всяких бед сохрани, купно с тобою
песнь Господу приносящих: Аллилуиа.

[Акафист преподобному Филарету составлен
протоиереем Андреем Николаиди, клириком
г. Одессы]



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**